



**FONO AOA O FAITULAFONO.  
LEGISLATIVE ASSEMBLY OF SAMOA.**

**LIPOTI A LE KOMITI O OLOA GAOSIA  
TULAGA MUAMUA, MATAUPU TAU  
PISINISI, ALAMANUIA MA LEIPA**

**I LE**

**TULAFONO TAU FAAOFI O  
TEUTEUGA O LE TULAFONO O ASO  
MALOLO MO TAGATA UMA 2014**

**(Tuuina atu i le Fono Aoa o Faitulafono)**

**1. FAUTUAGA:-**

**E fautuaina e le Komiti o Oloa Gaosia Tulaga Muamau, Mataupu Tau Pisinisi, Alamanuia ma Leipa le Fono Aoa ina ia faautagia lana Lipoti.**

**2 FAATOMUAGA:-**

O le Komiti o Oloa Gaosia Tulaga Muamua, Mataupu Tau Pisinisi, Alamanuia ma Leipa ua faavaeina i lalo o le Tulafono Tumau 174 ma e aofia ai:-

**SUI USUFONO****Filifilia**

Hon LEAUPEPE Toleafoa Apulu Faafisi	-	Taitaifono	30/05/2011
Afioga MAUALAIVAO Pat Ah Him	-	Sui Taitaifono	30/05/2011
Afioga AFUALO Wood Uti Salele	-	Sui Usufono	30/05/2011
Afioga TIALAVEA Fea T Seigafolava	-	Sui Usufono	30/05/2011
Hon AEAU Peniamina Leavaiseeta	-	Sui Usufono	24/06/2011
Tofa AVEAU Nikotemo Palamo	-	Sui Usufono	24/06/2011
Tofa FAIMALOTOA Kika I. S Ah Kau	-	Sui Usufono	20/08/2014

**3. TULAFONO TUMAU 174:-**

E tusa ai ma aiaiga o le Tulafono Tumau 174 o le a avea ma tiute o le Komiti o Oloa Gaosia Tulaga Muamua, Mataupu Tau Pisinisi, Alamanuia ma Leipa le:-

- (a). **Iloiloina o so o se tulafono tau faaofi, talosaga po o so o se isi mataupu ua tuuina atu e le Fono Aoa po o e tusa ai ma Tulafono Tumau; ma Tala Faatatau o Tupe po o le toe iloiloina o le faatinoina o galuega a matagaluega e pei ona tuuina atu i ai e le Komiti o Tupe Maua ma Tupe Totogi;**
- (b). **Suesueina o faiga faavae, pulega ma tupe alu a matagaluega ma faalapotopotoga a le malo po o nisi faalapotopotoga e fesootai oloa gaosia tulaga muamua, mataupu tau pisinisi, alamanuia, leipa ma tagata tafafao maimoa.**

**4. TULAFONO TAU FAAOFI NA ILOILOINA:**

*(Tuuina atu 20/8/2014)*

**Tulafono Tau Faaofi o Teuteuga o le Tulafono o Aso Malolo mo Tagata Uma 2014.**

Na iloiloina e le Komiti o Oloa Gaosia Tulaga Muamua, Mataupu Tau Pisinisi, Alamanuia ma Leipa le Tulafono Tau Faaofi o Teuteuga o le Tulafono o Aso Malolo mo Tagata Uma 2014, e tusa ai ma le Faatonuga na tuuina mai e le Fono Aoa Faitulafono i le aso 20 Aokuso 2014.

## 5. **TAUALUMAGA:**

Na valaauina e le Komiti le mamalu o le atunuu e ala i se faasalalauga faalauaitete i luga o le Televisi (S.Q.B. TV 1) ma le leitio faasalalau a le Faalapotopotoga o Faasalalauga (2AP) mo ni finagalo faaalua po o ni finagalo tusitusia e faatatau i lenei Tulafono Tau Faaofi. Peitai e leai lava se isi na faaalua sona finagalo pe tuuina mai se finagalo tusitusia e faatatau i lenei Tulafono Tau Faaofi.

Na tapā e le Komiti le fesoasoani a i latou nei a o faagasolo ana iloiloa.

### **FESOASOANI (T. T. 156)**

#### **Ofisa o le Loia Sili:**

Loretta Teueli	-	Loia Sili Fesoasoani
Theodora Matalavea	-	Loia Tusi Tulafono
Steffany Meredith	-	Loia Tusi Tulafono

#### **Matagaluega o Pisinsi, Alamanuia ma Leipa:**

Auelua Samuelu Enari	-	Ofisa Sili o Pulega
Lealali Ioane Okesene	-	Loia Faufautua
Alataua Tuliaupupu	-	Ofisa Autu,
Cedrela Tamati	-	Ofisa Asiasi Sinia
Neri Tuaifaiva	-	Ofisa Asiasi, <i>Leipa</i>

#### **Sosaiete a le Au Gaosi Oloa & Oloa Auina atu i Fafo:**

Tagaloa Eddie Wilson	-	Peresetene
Funefeai Oliva Vaai	-	Sui Peresetene
Papalii Grant Percival	-	Faufautua

## 6. **SAILIILIGA:-**

O lenei Tulafono Tau Faaofi o le a teuteu ai le Tulafono Autu o Aso Malolo mo Tagata Uma 2008. Faamaonia mai e le Matagaluega, o lo o iai nisi o aiaiga taua o lo o totoe mai i le Tulafono o le 1961, ma o le a faatumau pea i lenei Tulafono Tau Faaofi.

O le agaga moni o lenei Tulafono, ina ia maua avanoa tutusa mo le Vaega Tumaoti ma le Malo, pe a iai ni mataupu ogaoga e tulai mai e pei o faalavelave faafuasei faalenatura e aofia ai afa, galuafi, lologa ma isi. E pei ona matauina, o nisi o tagata faigaluega i le Vaega Tumaoti na galulue fesoasoani i taimi o faalavelave faafuasei faalenatura i tausaga ua tuanai, ua uma atu lava taimi o ia faalavelave faafuasei ma lē

toe faigaluega ai lava, ona o galuega laveai na auai atu iai ma ua lē maua ai foi ni faamanuiaga tau totogi.

Peitai o lenei Tulafono, ua aiaia ai le mafai e le Vaega Tumaoti ona talosaga i le Minisita mo ni Aso Malolo e avea o se Aso Malolo mo Tagata Uma. O le agaga moni e mo le puipuiga o nai tagata faigaluega. I lea tulaga, o le a mafai ai ona maua tutusa e tagata faigaluega ia faamanuiaga tau totogi e pei ona agavaa iai tagata faigaluega a le Malo. O aiaiga mo le moomia o le faia o Talosaga mo Aso Malolo e tusa ai ma aiaiga o lenei Tulafono, e i le Vaega Tumaoti lava le fuafuaga.

I aiaiga mo le soloia o le Tulafono o Faleoloa 1961, e afua mai ona ua matauina ua le toe aoga le tele o aiaiga o lo o iai. Molimauina foi i le Tulafono o lo o iai nei, e tele aiaiga e le o mulimulitaia e nisi o Faleoloa o lo o faatau ai aano o manufasi ma Fale falaoa (Bakery). E mafua lea tulaga ona o suiga i le atinae ua iai nei. Ona o lea tulaga, ua alagata ai ona soloia nei aiaiga ina ia alofia ai le solitulafono o tatou tagata, ae vagana ai isi aiaiga o lo o talafeagai ma o le a faaauau pea.

Matauina e le Komiti, e lagolagoina e Molimau na mafai ona auai mai i ana Iloiloga ia aiaiga o le Tulafono, vagana ai nisi o mataupu o lo o avea ma atugaluga e pei o le:-

- Tatau ona faamaoti mai i le Tulafono ia tulaga tau faalavelave faafuasei e ono afaina ai pisinisi tumaoti;
- Aiaiga mo tupe totogi (cost) a pisinisi tumaoti;
- E leai se inisiua e puipui ai;
- Tatala o le avanoa mo aso malolo faapitoa faaopoopo a le Au Faipisinisi;
- A leai se tagata faigaluega i aso malolo, e faigata ona toe amata le pisinisi ae ona ua faigata ona o aso malolo o le Malo, ma o le a afaina ai le tamaoaiga o tagata fai pisinisi;
- E le o maoti mai i le tulafono le fua faatatau o totogi mo tagata faigaluega ia e galulue a o faagasolo aso malolo o faalavelave tutupu faafuasei;
- Moomia le manino mai o le vaitaimi faatapulaa o tulaga tau faalavelave tutupu faafuasei;
- E iai faafitauli o le faaaogaina o le tulafono ae le talafeagai mo nisi ona o aso malolo mo nisi

Peitai, o le agaga o le Tulafono, e mo le puipuiga mo nai tagata faigaluega. O le tulaga i le faatulagaga o totogi, ua faamaonia mai e le Matagaluega, o le a tuuina mai faatasi i le Tulafono Faatonutonu.

I le faamalieina o atugaluga na folasia, e taua ai le amanaia o le itu aupito sili ona taua o lo o faamanino mai i le tulafono e faapea, o Aso Malolo a Tagata e ona galuega, e faavae i luga o se Talosaga a se Tagata e ona galuega. E i le Vaega Tumaoti lava le fuafuaga.

## **7. ILOILOGA AUILILI O LE TULAFONO TAU FAAOFI:**

I le iloiloa auiliili o lenei Tulafono Tau Faaofi ua faamalieina le Komiti ma o lo o talafeagai aiaiga uma ua faatulaga mai vagana ai le Faasaoga i le Fuaiupu 1 ua fautuaina e faapea:-

**FAASAOGA:**

**Fuaiupu 1:**

Ia aveese le fuainumera 2014 ma suia i le 2015 ina ia faitauina ai le Igoa o Tulafono e faapea:-

**“TULAFONO O TEUTEUGA O LE TULAFONO O ASO MALOLO MO TAGATA UMA 2015”**

**8. IUGAFONO:**

I le maea iloiloina o le Tulafono Tau Faaofi na faaiugafonoina ai e le Komiti e fautuaina le Fono Aoa,

**Ina ia faagasolo le Tulafono Tau Faaofi o Teuteuga o le Tulafono o Aso Malolo mo Tagata Uma 2014, faatasi ma le Faasaoga**

\_\_\_\_\_  
Hon LEAUPEPE Toleafoa A. Faafisi  
**TAITAIFONO**

\_\_\_\_\_  
MAUALAIVAO Pat Ah Him  
**SUI TAITAIFONO**

\_\_\_\_\_  
Hon. AEAU Peniamina Leavaiseeta  
**SUI USUFONO**

\_\_\_\_\_  
TIALAVEA Fea T. Seigafolava  
**SUI USUFONO**

\_\_\_\_\_  
AFUALO Wood Uti Salele  
**SUI USUFONO**

\_\_\_\_\_  
AVEAU Nikotemo Palamo  
**SUI USUFONO**

\_\_\_\_\_  
FAIMALOTOA Kika Iemaima Stowers  
**SUI USUFONO**



**FONO AOA O FAITULAFONO.  
LEGISLATIVE ASSEMBLY OF SAMOA.**

**PRIMARY PRODUCTION,  
COMMERCE, INDUSTRY AND  
LABOUR COMMITTEE REPORT**

**ON THE**

**PUBLIC HOLIDAYS AMENDMENT  
AMENDMENT BILL 2014**

**(Presented to the Legislative Assembly)**